

TRANTER UMENS: IL CASTING

da Chatrina Josty

TRANTER UMENS - LA NOVA COLUMNA EN LAS PUNTS. CHATRINA JOSTY, STUDENTA A FRIBURG, SCRIVA DA SIA VETA EN INA WG CUN DUS UMENS.

Daniele va davent. Apaina emprendi d'enconuscher parta in da mes dus cunabitants gia. El va a Minca a far in practicum sco informaticher. Markus ed jau restain damai enavos ed essan vidlonder da tschertgar in nov u ina nova cunabitanta. Far in "casting" numnain nus quai. Cler, che tar in casting tutga da far bleras dumondas. "Fimas ti?" vain nus dumandà la Seraina, l'emprima ch'è vegnida a guardar la stanza da Daniele. E nus vain dumandà anc bler auter, circa tut, dad A enfin Z. Mo pertge ch'ella è sa vestgida tut en brin na vain nus betg dumandà. Ma gist sia garderoba ha irrità il pli ferm. Markus na sa betg s'imaginar da star ensemen cun Seraina. E cun Sophie era betg. Era scha Sophie pareva dad esser ina fitg flotta. Ina sportiva. Ina lavuriusa. Ina pitschna. Ina finina. Jau na ma sai er betg metter avant da star cun Sophie. Sophie na mangia nagina chorn, danor pulaster. Mangiar chorn, quai è in criteri per nus.

Ralf mangia chorn, e Ralf ha era gista mangià in toc pizza cun nus, cur ch'el è vegnì al "casting". Ralf n'ha però gnanc num Ralf. Nus vain deplorablain emblidà ses dretg num. Tegnì endament vain nus però ch'el ha trais soras ed IL Powerbook dad Apple ! Ralf vegn londeror cun computers.

Sco quart è vegnì David. In cun egls a la chinaisa. David è da San Gallen. David legia pli gugent la NZZ co il Tagesanzeiger. Jau hai però abunà il segund e na vi betg laschar crititgar mia lectura. David mangia era chorn e Markus ed el sa chapeschan bain. Ma cun David na vi jau betg star ensemen. Markus ha tuttina era dubis. Pervi dals chalzers che David aveva en e ch'el n'ha betg tratg ora per vegnir en stiva.

Far "casting" è lustig. Quai pudessan nus era far sche nus n'avain gnanc ina stanza dad occupar, dschain Markus ed jau. E tgi sa, forse che nus faschain quai lura. Cura che Ralf stat lura qua cun nus. Nus ans avain decidids per Ralf. Ralf, che n'ha gnanc num Ralf sa numnadain ir enturn cun computers. Jau fiss persa senza in informaticher en chasa!